



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7



Sadio Mane Saudi club Al Nassr nung denogo

2020 election dak sendakba ken o nung Trump dak tai tongloktsü



VOL. XX NO. 291 (ADOK 291) DIMAPUR YANGTEPNÜ (THURSDAY) LUROI (AUGUST) 03, 2023 ₹ 5.00

## Gauhati High Court nung judge tasen 5 shimok

**Guwahati, August 2, 2023 (Agencies):** Gauhati High Court nung tetsür ana dena judge tasen pungu shimokogo.

Parnok ya Justice Kakheto Sema, Justice Devashish Baruah, Justice Malasri Nandi, Justice Marli Vankung aser Justice Arun Dev Choudhary nunger lir.

"Gauhati High Court Chief Justice, Justice Sandeep Mehta-nung nem tezüngzüktep agidaktsü" ta GHC sangdong ka nung ashi.

Judge tasentem shimokba züngsema Gauhati High Court nung tang Chief Justice dena judge 24 lir.

## Tetsür ana videokeno atema CBI-i nisung 6 apu

**Imphal, August 2, 2023 (Agencies):** Manipur nung nisung telok kati tetsür ana mangsa anir yimjak nung senzüba video dak sendakba nung Manipur police-i nisung 6 pua aliba Central Bureau of Investigation (CBI) ket nung agütsüogo.

Iba video nung nisung 14 indang maitsü jangjateta lir aser tanur ka dena police-i nisung 7 puogo. Tanubosang yabo tang 'observation home' ka

nung yua lir. Iba ken o CBI-i bushisügang arudang Bodbarnü nisung 6 parnok ket nung yuogo.

Mongulbarnü nisung 2 Court of Special Judges (SC&ST and Prevention of Atrocity Act) Thoubal tsüngdangi anir ao.

CBI-i okadak nisung ana parnok ket nung ayutsü asüngdangba temelaba agütsüogo.

## Arunachal CM Khandu takatisang; Manipur CM Biren sensaktisang

**Guwahati, August 2, 2023 (Agencies):** Northeast nung chief minister takartisangji Arunachal Pradesh chief minister Pema Khandu aser sensaktisangji Manipur chief minister Biren Singh lir.

Iba osang ya Association for Democratic Reforms (ADR) aser National Election Watch (NEW) ajanga metetdaktüsügo.

Tesüiba elections nung MLA temi affidavits agütsüba nung ajemdaker parnoki iba osang ya sangoktsü.

Arunachal CM Khandu indang rongsen Rs 163 crore tema lir aser pa sülen tanabuba nung Nagaland chief minister Neiphiu Rio lir. Rio indang rongsen Rs 46 crore tema lir.

Tasembuba jenjang nung Assam chief minister Himanta Biswa Sarma lir aser pa indang rongsen Rs 17 crore tema lir. Pa sülen Meghalaya chief minister Conrad Sangma lir aser pa indang rongsen Rs 14 crore tema lir.

Maneni, chief minister takatiba jenjang pungububa nung Tripura chief minister Manik Saha lir aser pa indang rongsen Rs 13 crore tema lir. Trokbuba nung Mizoram chief minister Zoramthanga lir aser pa indang rongsen Rs 3 crore tema lir.

Northeast nung chief minister sensaktisangji Manipur chief minister Nongthombam Biren Singh lir aser pa indang rongsen Rs 1 crore tema lir.

## BRO-i Tuensang-Mon lenmang lapoktsüogo

**Dimapur, August 2, 2023 (Agencies):** Tuensang aser Mon district tem sendaktepba lenmang anentsüh agi shibanger aliba tanü Border Roads Organisation (BRO)-i lapoktsüogo.

Tzünglu kanga aruba ajanga July 16 nü Tuensang district kübok Thimlak yimtsüng anasa iba lenmang nung anentsüh tulu ka alua liasü.

Anentsüh ajanga iba tesem nung Bailey Bridge ka chireper Aoyoung ayongi ai aser iba ajanga lenmang ajunga shibangtsüsa aküm.

Iba lendong atalokba sülen 15 Border Roads Task Force (BRTF) nung 100 Road Construction Company ajanga mapa inyaktsü tenzü. Parnoki tetsüng agi senzürtem asoshi July

18 nü aou agi apu ka yanglutsü. Iba sülen August 1 nü parnoki 110-foot Bailey bridge yanglu aser Bodbar nungi traffic atema lapoktsüogo.

### Changtongya-Longleng lenmang shibanger:

Külen, Longleng deputy commissioner Dharam Raj-i Changtongya-Longleng lenmang atema sangdong ka agütsüogo.

Changtongya aser Dikhu aou tsüngda lenmang nung nikonngang 6:00 ako nungi anepdang 6:00 ako tashi gari mesenzüdaktsüta ta Longleng DC-i ashi.

Lenmang noktangba mapang senzüsenbongertemi Longleng-Chingtok (IR camp)-Netnyu-Merangkong ajanga senzütsü metetdaktüsür, ta DC-isa ashi.

## Governor La Ganesan-i Tsüngremmong benjung nung aden



August 2, 2023 nü Mangmetong yimtsüng nung Tsüngremmong benjung amongdang (abelen) Nagaland Governor La Ganesan-i o jembiba aser yartsüngsanger temi shilem agiba angur.

**Mokokchung, August 2, 2023 (DPRO):** Nagaland Governor La Ganesan-i August 2, 2023 nü Mangmetong nung Tsüngremmong benjung nung shilem agiogo.

Deputy Chief Minister Y. Patton den MLA tem aser ketdangsürtemi Governor Ganesan meina aru.

"Asen state nung tensa süngjema aliba ajanga asenoki iba benjung amonger. Asen lima nung telongjem aser yimjung tangatetba lidaktsütsü atema asenoki iba benjung mongdi" ta

Governor Ganesan-i ashi. "Asen sobaliba aser inyaksangshi tajungtem wazüka ayutsüla aser tarutsü lanu putu dang sayutsüla" ta pai ashi.

"Tesüiba mapang Nagaland nung yimjung aser terenlok malütsüsa tensa ajurua liasü saka tanübo yimjung aliba ajanga kechisarena ajaklen renlokba asenoki angur. Tanü Nagaland ya linük den külemi liromedema jajar. Nagaland-i Arts aser talisa kentenba nung shilem tulu agir aser tawa World Choir Games nung Nagaland Chamber choir-i linük

tenüng nung shilem agia konang bentsür aruogo" ta Governor Ganesan-isa metetdaktüsü.

Deputy Chief Minister Y. Patton-ia Tsüngremmong salem abendang Aortemi wadang ajak nung shilem tulu agia aruba indang ashi aser maneni senmang tajung wazüka ayutsü aser bentshütsü ayongzü. Iba sentong nung IPR and Soil & Water Conservation Advisor Imkong L Imchen aser Mokokchung Deputy Commissioner Thsuvisse Phoiji natia o tatsütsü jembi.

## Manipur nung telungpurtemi Kom nunger tanishir amak

**Imphal, August 2, 2023 (Agencies):** Kuki nunger telungpurtem ta temulung meleme bilemertemi Kom Union Manipur (KUM) president Serto Ahaio Kom tepsettsü merangba aitsür ta Kom nungeri metetdaktüsügo.

Manipur nung May 3 nü Kuki aser Meitei nunger tsüngda rara adokba sülen Kom nungeri tiyongtsü nung dang lia arur.

Manipur nung Kom nunger ya nübo agi tangar memenepba kin ka lir aser alima ajunga metetba boxer Mary Kom ya iba kin nungi lir.

"Khoirentak Khunou yimtsüng nung tebu shirangba semdangi aodang Kuki Independent Army (KIA) telungpurtemi Mongulbarnü Serto amak" ta Kom Union Manipur advisor Boyes Kom-i ashi.

KUM president Serto-i Meitei nunger den tesentaktep lir ta tai tonglokja Kuki telungpurtemi pa dak kanga mejungi azük, ta pai ashi.

Langol Tarung nungi Churachandpur kübok Khoirentak-i aodang aonung 8:30 ako meta Chingphei

yimtsüng anasa Kuki nunger telungpur 30 shi kati pa anendaktsü ta KUM president Serto-i RIMS hospital nung osangbener dang ashi.

Parnok pa dak azükba aser tasüngdangba aika asüngdangba sülen telungpur kari pa Gypsy gari ka nung anir Chingphei Kuki yimtsüng tatemleni anir orr idakji anizüka yutsü ta Serto-isa ashi.

RIMS nung osangbener den jembiba mapang Kom Union Manipur Women Wing general secretary Kim Serto aser Union advisor T. Achung na liasü.

## UNC-i Naga MLA 10 dang special assembly session nung madentsü tuyur

**Imphal, August 2, 2023 (Agencies):** Naga United Council (UNC)-i Manipur nung Naga nunger MLA 10 dang special assembly session nung madentsü tetuyuba agütsüogo.

Manipur nung telok aikati August 5, 2023 nung mesüra matongdang Manipur state litsü kümzüka ayutsü atema Special Assembly Session ka agitsü takhangba agütsür, ta UNC-i ashi.

"Manipur nung aliba kin balalai pei pei jenjang aser putiotsütem angatetsüla aser akhümtsübu agütsütsüla. Naga nungeri kechi mapang südir süaka tetuyuba

kecha magizüktsü" ta UNC-i metetdaktüsü.

Manipur nung Chin-Kuki-Zo aser Meitei nunger tsüngda rara ajanga masüba ken o aika adoka jembir ta parnokisa ashi.

India sorkari Myanmar nungi nisungtem arudaktsüba policy ya anentsüla kechiyong Indo-Myanmar arrtsü ajanga nisungtem ozüng alema aruba manenra timtem aika adoktsü, ta UNC-isa metetdaktüsü.

July 23, 2023 nü Chandel District nung Indo-Myanmar arrtsü adena nisung 718 aitba osang Assam Rifle 29th Sector ajanga metetdaktüsüba

taoksatsüka lir ta parnoki ashi.

"Home Ministry, Government of India-i iba sentong atonga inyakba ya lisopurtem tashimait kümdaktsütsü aser northeast nung parnoki inyaknuba ama inyaktsü atema lir. State sorkari iba inyakyim azioktsü atema mapa inyaktsüla" ta UNC-isa ashi.

Manipur state sorkari National Registration of Citizen (NRC) mapa inyaktsü ayongzüker kechiyong NRC ajanga dang Manipur ama state tila ka nung ozüng alema arurtem azioktetsü, ta parnokisa ashi.

# 44 buba ANCSU Foundation Day mungogo



**Kohima, Luroi/August 02 (TYO):** Lanurtem pei saka pei poksunga alitsü aser linük asoshi rongsen ka ama kumdaktsütsü atema skill based education system nüngdaker, ta MLA aser NPF secretary general, Achumbemo Kikon-i tanü ashi.

All Nagaland College Students' Union (ANCSU) indang 44 buba Foundation Day cum Degree Toppers Felicitation sentong ka State Academy Hall, Kohima nung Bodhbarnü akadang, matric (Class X) pass asüba atema tsürabor aser kaketshirtem pelatepa liasü aser sorkar mapa angu, ta Kikon-i ashi.

Ajisüaka tanü putu tetokteper meyong kumogo aser Nagaland indang literacy rate tali kumogo aser sorkari zünger aliba lanur ajak nem sorkar mapa magütsüteter, ta pai ashi.

Iba atema education system ya skills dak ajemdaker alitsüla, aji asünung dang employment atema maongka agütsütsü aser zünger aliba lanurtem linük asoshi khuret masü saka rongsen ka akumtsü, ta Kikon-i ashi.

Tematiba jenjang anguba ya tatem masü saka ano tajungba inyaktüsü aser nübun nem meyipa agütsütsü khuret lir, ta pai ashi.

Alima nung tematiba jenjang

tongteter ya school züngpeter anenertem lir, anungji tematiba jenjang ngutetba kisüng ya tatem masü saka khuret tuluba bener arur, ta ashi.

Yimdak yimtsüng nungi rongsenketzüng jenjang majungba yong Naga nunger aikati academic tsütsü takok tajung monguteter, anungji nüchi akumtsü asoshi temapa jenjang nung takok angurtemi tali meranga inyaktüsü aser yimdak yimtsüng nung nübuntem asoshi tekolok aser mapang indoktsüla, ta MLA Achumbemo-i ashi.

Pai kaketshirtem dang kaket azüngba yimya mesamadaktsütsü ashi aser ibaji

ajanga shisatsü angutsü aser tekolok saksalema alitsü aser dangar ajanga ajungmesotsü, ta pai ashi.

ANCSU tir Toito D. Chishi ajanga iba sentong nung tir o jembi aser gold medallist aser subject toppers 53 nem tenüngsang tetushi agüja liasü.

Parnok ya Nagaland University nungi 21, Patkai Christian College (Autonomous) nungi 15, Kohima Science College Jotsoma (Autonomous) nungi 10 aser Technical aser danga courses nungi nisung tenet liasü.

Iba sentong ya ANCSU education secretary Imtinario Imsong lenisüba kübok agia

liasü.

Sentong nung toppers tenüng nung Modern College Kohima nungi Maongnaro Longkumer aser Khelhoshe Polytechnic Atoizu nungi Tsazila Sangtam nati o tatsütsü jembia liasü.

ANCSU Assembly Secretary Ikato Zhimomi menden sür agiba sentong ya Pastor, Chakhesang Baptist Church Ministers' Hill, Rev Dr Wepre Mero-i sarasadema tenzüik aser Vesazolu Chuzho-i temeja ken ka agi lokti ayongzüik aser ANCSU assistant general secretary Dzuzuve Swuro-i melepzüng o jembia liasü.

## Mokokchung nung SP office ki lapok



Mokokchung nung SP office ki Deputy Chief Minister Home & Border affairs Y.Patton-i lapoktsür kelen Minister, Advisor, MLA aser Police nung tekolak pur den külemi tangokba noksa nung angur.

**Mokokchung, Luroi/August 02 (TYO):** Mokokchung Superintendent of Police office ki tasenba tanu Deputy Chief Minister Home & Border Affairs Y.Patton-i lapoktsüogo.

Deputy Chief Minister-i iba office ki lapoktsüba sentong nung jembidang temzüng amshiba telok (Police) aser nübun tsüngda nung tesendaktep tajung alitsüla, kechiaser nübuntemi Police nungtaker aser Police-temi nübuntem nungtaker, talisa Police mapatong ajak nung nübun teyari medenra Police-temi mapa takok ngua meinyaktetsüta sentong nung adenshia aliba nübuntem aser Police-tem ayongzüka ashi.

Home Minister-isa Naga lima nung mim mozü shibelena ayokbaji tasadanga nung reprangdangra mezüngbubaji Wokha aser tanabubaji Mokokchung lir, itemji asoshi kanga dang sasa-a bilemer,

nübuntemi tim mesüi ozüng mamshitsüla, tawa Wokha nung mim mozü shibelena ayoker tetsür ana apu aser tenaji tetsürtemi ko tashi mejepja maksüja merenshi, parnoki yamaji meinyaki Police ket nung agutsütsü tim ta ashi.

Naga lima nung Bangladesh nunger talisa Illegal Immigrants maliba district-ji Mokokchung dang lir, tanga district-ji toktsür Wokha town nung Illegal Immigrants tasüng lir, asenok Christian lima asünung deobar anogoang shishilembaba shibanga yur Tsüngrem külemer saka Wokha nungbo Hokolbar anogo parnok shishilembaba shibanga yur par Tsüngrem külemdang asen nübun asen lima nung timatemer, aji asünung asenoki aji meteta shisa ka-a alitsüla Nagaland Home Minister Y.Patton-isa tesasaba olen ka ashi.

Kasa sentong nung Minister Metsübo Jamir, SP Mkg. Manoj

Kumar A IPS, Executive Engineer PEP Alichen Er. Kito A n c h e , A D G P ( A d m ) Renchamo P. Kikon IPS parnokia shilem agia jembiba den iba ki meshitet sarasadem Mkg. Yim Pastor Rev. Imtimpang-i agi aser sentong nung Tsüngrem lenisüba jazüka Police Baptist Church Pastor Rev Lima-i sarasadem aser Addl. SP Mkg. Y. Tumchobemo, NPS ketdangsüba nung iba sentong agi.

Tanu iba office ki lapokba sentong Minister ana, Advisor trok aser MLA asem atenba den Ao Senden, Watsü Mungdang, Ao Kaketshir Mungdang aser Mokokchung Yim yimsüsür, Ungma Yim Yimsüsür Khensa Yim yimsüsür aser Chuchuyimpang Yim yimsüsür adenba den Political party balala nungi lenirtem aser Mokokchung nung office ajak nungi tekolaktem aser nübun aika dena liasü.

## Politics ya election atema kisüng masü: Minister Kruse

**Kohima, Luroi/August 02 (TYO):** Politics ya election mapang atema kisüng masü saka nübuntem ajangzüksü asoshi inyaktüsü atema lir, ta Minister, Women Resource Development & Horticulture, Government of Nagaland, Salhoutuonuo Kruse-i ashi.

Bodhbarnü Kohima nung Nationalist Democratic Progressive Party (NDPP) Kohima Region lenirtem senden ka nung jembidang assembly constituency trok aliba Kohima region indang Legislator in-charge, Kruse-i party aser lenurtem tashi itdaktsütsü asoshi grassroots nung tashi ita yangertsüla, ta ashi.

"Asenoki party aser asen lenirtem tashi itdaktsütsü asoshi maneni meranga inyaktüsü, kechiaser telesa adokdaktsüba tashi teti lir," ta lai ashi.

Assembly constituency trok nungi party lenirtem dang lenir ka ama pei nübuntem asoshi inyaktüsü aser nübuntem atema aliba scheme aser sorkar sentong balala indang awareness agütsütsü nenshia

ashi.

Party indang motto 'Facta Non Verba' (O masü mapa) den athishia jembidang, dangari nemtsü ataa makazüi lenir ama asenoki asen atema aser nübuntem atema inyaktüsüla, ta ashi.

Party züngsemtem tsüngta telungiem alitsüla aser maparen ajak ochishia inyaktüsüla, ta Minister Kruse-i ashi.

Region nung aliba nübuntem teyari aser amalitep aginüa jembidang, state nung party tashi aittsü asoshi akokba lenmang nung yariteptsü, ta lai ashi aser ajak lungiemer nübuntem asoshi party mangdang asangsang kuma inyaktüsü amanger, ta shisem.

NDPP Kohima Region indang acting president Prasielie Pienyü-ia party aser lenirtem tashi itdaktsütsü asoshi meranga inyaktüsü, ta ashi.

"Chief Minister Neiphui Rio-i anir aliba sorkar ya tashi ita lir aser asenoki asen CM aser legislator tem teka tashi itdaktsütsüla. Anungji party züngsem ajunga nungi amalitep nüngdaker," ta Pienyü-i ashi.



Emporium Skills Training Institute Dimapur (ETCPL) nung August 2, 2023 nü India nung airline tajung kati campus interview agia liasü. Iba mapang cabin crew atema tetsür 25 shimteta liasü. Noksa nung cabin crew atema shimteter kar angur.



August 02, 2023 nü Rashtrapati Bhavan, New Delhi nung Rajya Sabha nung Opposition Lenir, Mallikarjun Kharge leniba nung INDIA teloktep nungi MP temi Tir, Droupadi Murmu ajurudang tangokba noksa nung angur.

### Manipur dak sendakba nung Opposition lenir temi Tir ajuru

**New Delhi, Luroi/August 02 (Agencies):** Manipur tensa dak sendakba nung Bodhbarnü opposition lenir temi linük Tir, Droupadi Murmu ajuru la dang Manipur tensa atema tiyongtsüü ia inyaktüsü mepishiogo. Rajya Sabha nung Opposition Lenir aser Congress Tir, Mallikarjun Kharge leniba nung INDIA teloktep nungi MP temi Tir ajuruba mapang nung

Kharge-i opposition party tem tenüing nung Tir, Murmu dang mapang meshi. Opposition party temi Tir dang, BJP-i yimsüsüba northeast state nung tang tashi tensa mesüingjemteter, anungji nai tiyongtsüü ia inyaktüsüla, ta mepishi. Bodhbarnü Tir ajururtem rongnung tawa (July 29-30) Indian National Developmental

Inclusive Alliance (INDIA) teloktep nung Manipur semdang MP tema kar densema liasü. Opposition-i Rule 267 kübok Parliament House anaprongla nung tanga onük ajak anener Ato kilonser, Narendra Modi-i Manipur dak sendakba nung sangdong ka agütsüsüla, iba sülen o lemtep tenzüksüsüla, ta takhangba agütsür.

### SC-i Centre aser state sorkartem dang tesempa o nokdangtsü tuyu

**New Delhi, August 02 (Agencies):** Bodhbarnü Supreme Court-i Centre aser state sorkartem dang Delhi-NCR nung VHP aser Bajrang Dal-i longkak aitba mapang nung tesempa o jembiba aser rara nokdangtsüla, ta tetuyuba agütsüogo. Haryana state kübok Nuh nung tamangba lokti tsüingda raraba anema VHP aser Bajrang Dal-i Delhi NCR nung longkak aittsü. Justice Sanjiv Khanna aser Justice S V Bhatti nati akümba bench-isa sorkar dang, police aser paramilitary sepaitem tali lezmüksütsüsüla aser rara adoktsüsa aliba tesem ajak nung CCTV cameras ayutsüla, ta metetdaksü. Journalist, Shaheen Abdullah atema jembitsür, senior advocate C U Singh-i, right wing telok- Vishva Hindu Parishad (VHP) aser

Bajrang Dal-i National Capital Region (NCR) tesem balala nung longkak aitba sentong 23 agütsü sangdongogo, ta SC nem metetdakja liasü. July 31 nü Haryana state kübok Nuh nung VHP-i longkak aitba sentong telok kati nokdangtsü merangba nungi tamangba lokti ana tsüingda rara adok aser tang tashi nung home guards ana densema nisung trok süogo. Iba tatalokba dak sendakba nung police-i tang tashi nung nisung 116 puogo, ta state sorkari metetdaksü. Bodhbarnü Haryana chief minister, Manohar Lal Khattar-i, police-i records aser CCTV noksatem asadanga rara adokdaksürtem aser aibelenertem ajak aputsü merangdar aser aibelenertem dang tai matoktsü, ta

metetdaksüogo. CM Khattar-isa, central sepai company 20 Haryana nung lezmüksüogo aser iba nungjagi company 14 Nuh nung, company asem Palwal nung, Gurugram nung ana aser Faridabad nung company ka lezmükja lir, ta metetdaksü. "State sorkari ano central sepai company pezü agüjang ta mepishiogo. Iba dak alia IRB battalion ka Nuh nung lezmüksütsüsü," ta pai metetdaksü. Haryana chief minister-isa, rara nung shilem agidang kiojen raksatsürtem nem kiojen raksaba ajak menokdaksütsü, ta metetdaksü. Bajrang Dal lenir Monu Manesar dak sendakba nung Haryana chief minister-i, pa anema inyaktüsü asoshi Rajasthan Police dak tashi lir, aser state sorkaria yariteptsü, ta metetdaksü.



August 02, 2023 nü New Delhi nung Union Finance Minister Nirmala Sitharaman, Union MoS for Finance, Pankaj Chaudhary aser Revenue Secretary Sanjay Malhotra nung 51buba Goods and Services Tax (GST) Council senden nung adendang tangokba noksa nung angur.

### UGC-i Universities 'taila' 20 sangdongogo

**New Delhi, August 02 (Agencies):** Bodhbarnü University Grants Commission (UGC)-i University 20 taila lir aser degree agütsüsü atema item university dak tashi mali, ta metetdaksü. Taila university ji teimbaka Delhi nung lir. UGC Secretary, Manish Joshi-i, "UGC Act alema shisaliok reju kari degree agütsür ta UGC-i metetogo. Item universities-i agütsüba degree ji 'recognise' masütsü mesüra temaba shisaliok mesüra mapa balala atema 'tamagitsü' asütsü. Degree agütsüsü atema item universities nem tashi kecha agüja mali," ta metetdaksü.

Commercial University Ltd, Daryaganj, United Nations University, Vocational University, ADR-Centric Juridical University, Indian Institution of Science & Engineering, Viswakarma Open University for Self-Employment aser Adhyatmik Vishwavidyalaya (Spiritual University) lir. Uttar Pradesh nunga universities taila pezü lir, aser itemji Gandhi Hindi Vidyapith, National University of Electro Complex Homeopathy, Netaji Subhash Chandra Bose University (Open university) aser Bhartiya Shiksha Parishad lir, ta UGC-i metetdaksü. Karnataka, Maharashtra, Puducherry, Andhra Pradesh, West Bengal aser Kerala nunga taila universities aika lir, ta UGC-isa metetdaksü.



August 02, 2023 nü New Delhi nung Delhi Chief Minister, Arvind Kejriwal aser Delhi Education Minister, Atishi Singh nati Sangam Vihar nung sorkar school buliding ka semzüksüba sülen tangokba noksa nung angur.

### Rajya Sabha nung Forest (Conservation) Amendment Bill agizükogo

**New Delhi, August 02 (Agencies):** Bodhbarnü sorkari Rajya Sabha nung Forest (Conservation) Amendment Bill 2023 benoka agizükogo; iba bill ya taoba ita Lok Sabha nung agizüka liasü. Bodhbarnü Rajya Sabha nung Forest (Conservation) Amendment Bill 2023 benokba mapang nung Environment, Forest & Climate Change Minister, Bhupender Yadav-i, Congress-i aniba sorkar aliba mapang 1950 nungi 1980 küm tashi nung arem ali hectare lakh 45 sama, ta ashi. BJP lenir, Sushil Kumar Modi-i, iba bill nungja Van (Sanrakshan Evam Samvardhan) Adhiniyam ta melenogo aser iba bill nung okila ka inoksemogo, ta metetdaksü. Minister-isa, iba bill tasenba kübok arrtsülen Line of Actual Control aser Line of Control nung kilometer 100 telongtet tashi nung kanga tongtibang project amenoktsüsa kümra melatsü mesüra linük security atema ali hectare 10 tashi nungbo Forest Conservation inyakyim mebenshiyonga tereelok mapa inyaktüsü, ta metetdaksü. Ajisüaka central sorkar inyakyim nung ajemdaker item arem liji agitsü, ta pai ashi. Iba dak alia Maoists telungpurtemi titem agütsüba

tesemtem nunga ali jectare 5 tashi nung terenlok mapa inyaktüsü atema arem li agitsü akok, ta ashi. BJD MP, Prashanta Nanda-i iba bill puemer ta ashi, ajisüaka 1995 küm Supreme Court-i arem tetezü ratettsüba ama inoksemtsüla, ta ashi. Rajya Sabha nung mapang tatsüka (Conservation) Amendment Bill, 2023 atema jembiba sülen iba bill agizük, ajisüaka Manipur onük nung longkak aita opposition party tem nungi MP tembo senden nungi ayazüka ao. Iba bill kübok linük arrtsülen kilometer 100 telongtet nung aliba alibo arem atema wazüka ayuba nung mezüingsemtsü aser item arem nung zoos, safaris aser eco-tourism facilities amenoktsü atema temelaba agütsüsü. Forest (Conservation) Amendment Bill 2023 ajanga sorkari achaayangba railway lenmang mesüra gari lenmang anasa aliba aremtem, arem wazüka ayuba küboki maittsü aser nisung alitsü, railway tasen yanglutsü aser lenmang anasa terenlok mapa balala inyaktüsü atema arem li melatsü. Iba dak alia security dak sendakba terenlok mapa, defence dak sendakba projects aser sepaitem camp amenoktsü atema ali hectare 10 tashi melatsü.



## TIR YIMYIM YIMOBILEM (EDITORIAL)

DIMAPUR YANGTEPNÜ, LUROI(AUGUST) 03, 2023

### Shiranger aneptsürtem

**A**lima nung nübortem nem nungdakba teyari agütsürtem zünger mezüngma lir aser item rongnung nungdak tongtibangtiba aser tulutibaji shiranger aneptsür medical doctor-tem ya asütsü, parnokjibo shitakba Tsüngrem melen alima nung ain amshia temeim mapa inyakterem lir. Ibayongji, nisungtemia parnokji kanga akhümtsübur. Ajisüaka, ajak kasa masü, anungji medical doctor-sa süaka karbo shiranger yaritsübaji tongtibangba masü saka senotsü ajangzüksü nükjidong tuluba ser inyaker. Ibayongji, government mozü kidang inyakterema karibo tanga private mozü kidang inyakba dang masü saka pei private mozü ki dena yanglur. Itemjibo kenyongi medical doctor inyaksüsa tangatetba shisatsü maliba purtem lir. Atangji, medical ya peisasa private nung azüng nungbo sen crore dak tali oa adoker, anungji züngzüker külen tazüngdang atsüba sentsü aotsü atema meranga inyaksüsa akümer. Iba jagi private hospital aika nung shiranger yariba taa sen aika meshir. Iba khuretji nisung aikati makoker, anungji shiranger aika government mozü kidang taneptsü mengutetra, makamaitba agi private mozü kidangi moutet, taküm tatembang akümer. Iba timtem aser nungdakji reprangteta government-i nübortem nem taneptsü agütsüsüba sentong aser maparen nung kanga temulung agüja inyaker. Aji oda, nübortem shilumanem tia ajurudang senotsü meindoki angati taneptsü ngutettsüsa government-i medical züngnertem rongnung tajungertem shimteta government sen agi züngdaksür aser züngzüker külen ita sen tajung den talitsü ki aser nungdakba teyari agüja government mozü kidang inyadaksür. Iba jagiang tashidak tulu nungi sensakertema aika angati taneptsü ngutetter. Aji oda, tazüngdang nungi government-i yaria züngdaksür külenang ano ita sen tajung agüja government mozü kidang nübortem shilumanem tia ajurudang yaritsü shima toktsü nung, yangjibo mapai maor aser meinyaker aser aoyonga khen angodangerbo oadoker ta asüba medical doctor-temjibo nisung meimchir mulungjang adenba nisungbo memesük. Item jagibo nisung rangseta toktsür sen meshitsü aser nungdak maliba nung metendangtsüla ajak tendanga operation agitsütsü. Aji oda, item jagibo shiranger aneptsütsü bilema sotaktsüba masü saka pai amenokba machine jenjang menoker külenang yakta tajangzük angutsü asoshi ariteptsü. Atangji, yamaji meinyadaksütsü atema government mozü kidang inyaker doctor-tem nem senotsü teyari talila agütsür aser government mozü kidang inyaker shiranger private nung meinyaktsü ozüng nenshia metetdaksüogo. Ibayongji arogo nung sannüker dang arogo nungertemi sentepi arung ta ashiba amai dang lir. Atangji, Nagaland nung temeim aketba ochishir medical doctor aika lir. Item jagibo sen-ang talila magili ta ser private mozü kidang meinyaker. Ano, nübor meimba doctor aikati koba tesemi yokdir yokaka lenjang aser tsüket ta mali oagi nübortem den lia inyaker. Itemjibo nübortem asoshi kotak nungi yokba tenyartem amai lir. Ajisüaka, doctor aikati Community Health Center aser Primary Health center alidak nübortem anepalutsü yokyonga maor. Iba jagi CHC aser PHC-tem nung doctor-bo peria yoker ser nung tenüng agi 'emergency case' reprangtsü atema dang doctor ka ana alir. Aji oda, temeim maliba temulungjang aser tekasa rongnunga medical doctor dak temeim malibajibo nisung aneptsür teka aser temulungjang masü nisung tepseter temulungjang aser teka asütsü. Mapasa rongnunga temeim, tangatetba aser temulungtetba tulu lia inyaksüsbaji shiranger aneptsüba mapa ya lir. Shirangerji tesempatsüka aser tajidaksüka, anungji temeim maliba teka agi kodaser shiranger dak meima kongshitetsü ? Iba temeimji melira tamasyongi medical mazüngtsüla aser medical azüngtsü majungshitsüla.

## OLEMSABANG

### PAR AKA, ASEN MAKA...!

- Lipoksungkum Imsong

Ocet nung olong ajak agi2165 ya azüngtsü mapang melira Otem ya tamasa züngang - *Cancer patient* ka *PET Scan result* agiba amai, temang nung cancer tashidak aliba ajak temai adoka sayuaka, yimya agi, nisung jagi, ni shiranger ta *admit* masu tashi, *treatment* magitsü. Shirangaka, ni shiranger masü, ni ajak dang tashi taitba, lanuwa mapang ni khen danga meshirang, anungji ni junga dang lir ta dang bilema kazüra, tashidak ji tamajungba dang akümtsü. Saka, ano, ni shiranger ta *admit* süaka, *cancer* tashidak tulu süra, aneptsü lenmang sadema mali. *WhatsApp group* ka nung *P Shilu Ao Park Mokochung küm 20 shi oaka merenemba* indang ni züngshi... aser iba yagi kü dang tasüngdangba aika asüngdangtsü tenzük.

1. Asen lima tesem aika nung **tzü** ya kanga anünger asü nung tzü indang ka mezüng shidi. Tamalen PHE Menteri 2024 tashi nungbo ajak atema '*clean tap water*' agütsütsü ta ashi. 2023 tashi nung iba mapatong ji koma odar ta yakta dang temulung nung bilem. Iba ya *Ministry of Jal Shakti - Department of Drinking Water & Sanitation* kübok JJM (*Jal Jeevan Mission*) ajanga inyaker. Tatsüba agi *Ministry* jagi sen peria yokdar kechiyong tapi agi ajak atema 2024 tashi nung *pipe* ajanga tzü temerük agütsütsü indang ji shingaia mejembitsü. Anogoshi nungdak (*Basic Need*) aika rongnung tzü indang ji ashir; saka iba mesükba mapatong aika tejembi dang jembir bo *paper* nung dang osang küma adoktsür bo mapa makümba kwi lir? Yamaji süaka kini, mesüra tzükongi, mesüra yimi ola adokba aika bo angashia mali. Asenok nungdak atema *Parliament* nung anakshia jembir sen lezmüka yokba ji bo tatem tashi bushitsüla; pei süboki idaktsütsü atema masü saka arok ajongloktsü mechi.
2. **Fazl Ali** koda? Nagaland nung bo mezüngbuba *college* saka tangar tesüpur *autonomous college* tashi kümaka asenok kechi tia nung lir?
3. **Mokokchung Law College** koda? Anarongdena AKMi anebalua odar; *Government Law College* ka akümtsü kin rangbeni inyaksüla mapa maket a na ya?
4. **Mokokchung HQ toktsür** tanga *subdivisiontem* nung *education* aser *health infrastructure* koda? Hau! tawa *Model College* ka Mangkolemba nung lapoker, kanga junger. Tuli area nung Tuli college lir aser tatem. *Health infrastructure* ji bo kecha tejembitsü maka. Nagaland Medical College koba dang joko *NIMSR - Nagaland Institute of Medical Science & Research*ta ajar aji taküm apusotsü amai aser iba sülen bo *Mon Medical College* arutsü. Asen lima *District hospital, CHC* aser *sub centrestem* nung nungdak aika meperi dang lir. Hau!*Government* indang kiojen aser riju nung aseni koda teka amuoktsü saka timtem bo asen nüburi ajangshidar ko ya. India nung *AIIMS 24* nangzüka akaba nungi tang 20 *operate* süa *function* südar. Northeast nung Gauhati nung ka akaba dak alema tanga ka danga mali. Nagaland nunga ka bo lapok langa lir ja. Aser iba jia Mokokchung nung asü nung bo ta jangratema bilema liogo.
5. **ICIT ya engineering college** akümtsü merangdar ma? Nagaland nung *Central Government* indang NIT dak alaka *Engineering College* maka. India nung IIT 23 tashi liaka North East nung bo Gauhati nung ka akaba ji dang lir. IIT Madras indang campus ka Zanzibar, *Semi-autonomous province of Tanzania* nung 2023 October nung lapoktsü lir. Ano IIT Delhi indang campus ka Abu Dhabi, UAE nung lapoktsü zülutepogo. (Masters' Degree January 2024 nungi & Bachelor's Degree September 2024 nungi ta tenzüka sayutsü). Asenok a *statehood* ngur küm 60 bo taküm abensar ji IIT / Engineering college mesüra Campus ka asü nunga odalapoktsüjia langadokogo. Iba ama ya Naga nung shingaia India dang memeshir aser kecha kinia asen state dang memeshidanger. Asen kini danga ajak junger bo ta bilema lenmang kar bushi nung koda? Atoizu indang *Polytechnicji engineering college* akümtsü bo jembishidar. Asen lima nung akaba küm 20 tain ICIT atema jia merangdangyonga tajung masü na? Naga nung ajak ajangzüksü saka asen sa tajangzük tuluba lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Arogo nung toklang tenzüker kinüingbutem sentong agi



**Impur, August 02 (TYO):** ABAM Women Ministry ajanga ayonga agia aruba toklang tenzüker kinüingbutem sentong Zone 1-7 asoshi August 1&2, 2023 anogotem nung "Tenzükba nung külemi" omen sur Impur nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

nungi toklang tenzüker kinüingbutem parnok 30 arua aden.

Iba sentong ya tenzüker ka kibong nung arok shilem teinyaksü tangatetba agütsüba den tenzükbawad nung kibong rangben libaliro lirumedema aliba ajanga Tsüngremi temoatsü agitetba indang tangatetba agütsüba sentong liasü.

Iba sentong nung Shisalen

Sayurtemji Rev. Dr. Mar Pongener, Executive Secretary ABAM, Rev. Sangyula Imchen, APW, Mangmetong Baptist Arogo, Mrs. Alemla Mozür, Secretary, ABAM WM aser Mrs. Arenla Lkr, Coordinator, ABAM WM nung liasü.

Tsüngremi Arogotem nung kibong rangbeni tenzükbawad ajanga tanelar wadang tali awajema inyaksü sarasademer.

# Tsüngrem yimli atema asenoki Al amshitsü akok: Nick Vujicic



Nick Vujicic (ajichilen) aser tebu Boris Vujicic na noksa nung angur.

**Orlando, Luroi/August 02 (Agencies):** Technology tasen- Artificial Intelligence (AI) dak sendakba nung o entepba mapang ka nung nungtugu sayutsünger, Nick Vujicic-i, alima tesem balala nung Khrista osangtajung prokba nung artificial intelligence (AI) aser digital media-i tongtibang shilem agitsü akok, ta metetdaksü.

oshi mejembir, ibayongji pai AI technology aser monginten amshia custom video translation solution 'Multitood' yanglu, ta metetdaksü.

AI ola aser translation tools amshia Multitood ajanga Arogotem aser content yanglurtemi oshi tsütsülen kecha tetsükdaksü makai alima tesem ajaklen nüburtem ayimjemtsü.

Iba software ajanga video balala oshi 36 nung meyipzüksür.

"AI ya tajungba-tajungba dang akümer. AI nung tajung dang masü saka tamajung-a lir. Ajisüaka Tsüngrem yimli atema onoki technology amshitetba atema onok kanga pelar," ta pai metetdaksü.

Teti amshiba yimya nung dubbing asüba nung minute shia dollar sen 75 adoker aser mapang jenti indoker, ajisüaka Nick Vujicic-i ketdangüsü adokba 'Multitood' ajanga minute shia dollar sen 10 dang adoktsü.

Vujicic-i ashiba agi, Multitood amshiba Arogotemi telangzüba tajung agütsüdar, kechiyong sayungtsünger onüktem oshi balala nung meyipzüksü atema kanga

zübaa kümogo aser oshia aika nung podcasts süteter, aser ibaji ajanga alima tesem balala nung kin aika den Khrista osangtajung lemsatepteter.

Alima nung digital platforms balala kanga bulua amshitepba mapang ka nung Yisu Khrista osangtajung proktsü aser Tsüngrem yimli atema technology ya tashitait hadir ka kümtetsü, ta pai ashi.

"2011 küm nungi tenzüka oshi 36 nung rangloker inyaksü aser ibaji ajanga alima nung nütsüng shilem 85 ayimjemtsü atema Tsüngremi kü nem mangdang agüja liasü. Anungji asenoki angatetsü kaji- Tsüüngrem yimli atema asenoki akokba tashi hadir ajak amshitetsü," ta pai ashi.

Iba dak alia Vujicic-i documentary film yanglutsü tejangraba lemsatep. Taruba küm asem tsüngda pa indang production company ajanga pai documentary film trok adoktsü tebilemba lir.

Mezüngbuba documentary, "The Cost of Truth," ji Evangelical Pastor, Joseph Bondarenko indang taküm otsü nung ajemdaker yangluba lir. Pastor Joseph ya KGB-i apuba sülen pa dang Khrista tokjang mesüra na reshikangshitsü, ta amokmerena liasü. Pa reshikangshiyonga takümbo kümzük aser tang pai America nung saaksalemdaksütsü nükjidong nung inyaker.

Ano tanga documentary rongnung kaji- Hungary Ato kilonser Viktor Orban-i yimsüsübaren nung Laishiba nung aliba ochiba ajanga len anidaksüba indang documentary lir.

# ANO GO ABEN TSÜNGREM DEN

## Tetuyubaji Medemdangang

T.Ken 119:73-80

Oset aser mozü ajak nung koda amshitsü, koda achitsü iba tetuyuba agütsür ayoker. Hotel aser kidang tetuyuba yanglua yur agüja aliba ama chiyongtsü renemer aser agütsür.

Taküm asoshia tetuyuba (manual) kaket lir aser ibaji "Laishiba- Tsüngrem" lir. "Ne ket agi ni yanglu aser ni renemtsü: ne temelaba ozüngtem ni angazüksüsa kü nem tangatetba kua" (t.73). Tsüngremi asenok Pa mesükba nung yanglu aser renemtsü. T.Ken 139 nung ashir, asenok masüdag Pai asenok asoshi sentong yanglu. Pai asenok ajak nem tekolok balala aser temang tenük telen ajak abensa agütsü. Pai pa kaket nung asenok nem agütsüba anogotem zülü, aser Pai asenok asoshi tajungtiba sentong yanglu. Pai ano asenok taküm alitsü tetuyuba kaket zülü.

Pai asenok nem Laishiba agütsü aser ashi, "Ni ne nem tangatetba agütsüner. Nai Laishibaji koda tajungba angatetter, nai nesasa tajungba angatetsü. Ni mesükba nung na yanglu. Ne tetsüng, ne tenük, ne tenarong aser ne temeli koda amshitsü. Ni kü O nung jungkai adokdaksüner. Ne mulungjangi mapa koda inyaksü ni Kü O nung ne dang shiner." Ken züluri ashir, "Ne ket agi ni yanglu aser renemtsü- ibaji asenok arudak lir." "Ne ozüngtem angatetsü kü nem tangatetba agüjang"- ibaji asenok mapa lir. Laishibaji asenok taküm asoshi sensaba (operation) tetuyuba lir.

Nisungtemi taküm alitsü tetuyuba kaket ka makai taküm alibaji koda tesüngmangtsü. Kibong raksar, taküm raksar, aser kechiba ta süngmanger. Tamakok marudang, Tsüngrem O ji zügang, anogo shia koda alitsü tetuyuba nung agüja aliba ama liang.

Tsüngrem O jagi taküm nung tenük-telen ajak azüoker aser tamang agi alitsü tetuyuba agütsür. Kodang taküm nung tayongzükba aser tebilemetsü ajurudir, taküm asoshi Tsüngremi taküm sensaba tetuyubaji repringang. Ibaji Pai ne taküm asoshi sentong akaba den putepa kümdaksütsü.

# Dalit nung kibong 230 Khristan yimsü dangi meyipdaksür ka apu

**August 02, 2023:** Tawa Uttar Pradesh state nung Dalit nung kibong 230 Khristan yimsü dangi meyipdaksüsang Police-i puogo.

Hindutva telok ka nung züngsem, Vijay Hindustani, pa den nisung kari Rawat aliba tesem semdangba mapang nung yangji Hindu tsür aika liasü, ta ashi.

Lucknow nungi Khristan, Bajrang Rawat-i Dalit nung kibongtem dang pai parnok tashidak ajak aneptsütsü ta nangzüka liasü. Pa tesüiba küm ka tashi Lucknow nung aliba Lonikatra police station kübok railway ali nung telidak liasü, ta Additional Superintendent of Police (ASP), Akhilesh Narayan Singh-i metetdaksü.

Paisa, Rawat-i yangji aliba sensakertem aneptsütsü ta shia par kidangi jaoker aser mesüzüka Khristan yimsü dangi meyipdaksür, ta tai tongloksü.

Par kidang nungi Laishiba ka den Khristan kaket aika apu, ta Singh-i ashi.

Pai police dang, Rawat-i temang repringtsüba ajanga parnok shirang anepadoker, iba sülenbo parnok Hindu nung tekülem kidangi maoyer, ta metetdaksü.

Haidergarh jila nungi nisung ka tenüng agi, Vijay Hindustani-i Rawat anema ken o agütsüba sülen pa anema Uttar Pradesh Prohibition of Unlawful Conversion of Religion Act, 2021 kübok ken o benok, ta ASP-i metetdaksü.

Hindustani-isa, Rawat aser par kibongi Dalit nung kibong 230 shi Khristan yimsü dangi meyipdaksüogo, ta metetdaksü. Rawat-i Dalit nung kibongtemji medical treatment agitsü atema Jalandhar-i anir aoyer aser yangji Khristan yimsü dangi meyipdaksür, ta paisa shisem.

**AO OSHI ANGAZÜKDAK:  
TANÜ ANGAZÜKTSÜBA OJANG**



Rong

(adj) sentsü (Colour)

\* Ki tasen nung rong atepdang sen aika aoer.

Rongaronga

(v) ajaki semloktepa jembibi (noise in crowd)

\* Telok nung ajaki rongaronga atua jembiba agi timtem adok.

**OLONG PAITEP # 6595**

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

**TIPIEN**

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzunglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenung kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anungdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. \_ \_ \_ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenung atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6594 TELANGZÜBA**

**TIPIEN :**

- 2. Pongsen, 5. Lepko, 7. Omen,
- 8. Maangka, 10. Yangkhu,
- 12. Senpong, 14. Angu,
- 15. Raksa, 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nungdak, 10. Yongya,
- 11. Kongro, 13. Ora, 14. Ata.



**Alokba-i 'Public Leader' Sobangba atala-menutsür**

**Alokba** : Hai tular...Nenek amala dang ya Impezük 'Public leader' ta ajar... Tangar sülen tekong angumdena hai-hau ta anidaktertem.... English oshi agi 'Puppets' ta ajar. Tangari asem (Drum) atemdang jokshishia tsüngsangertem.

**Sobang** : Hai Alokba....Nai kodaser ni ama 'Public Leader' ka yamaji mezüngmeshia jembir. Ni yabo tai madokja....Yimden sabang nung dang jembidi noo.

**Alokba** : Waaa...!!! Na aji kechi manganütsü alika...Arem min nung Kiyi (Tiger) Tzüko-po Kiyi tuluba ama hummn....humnn....ta arrua alitsü ashi....Lapi-lara adi....Tangari tokshi-toklem tera danga agutsüra...aji menaktsüba imlaseta... Pei menden shidakba toktsür tangar sulen hai-hau ta anidaker noo...??? Pei menden shidak nung mener aküm küt-küta liangma... Osettsüset-a ya aliang ta ashiba denbo tangari ni aji alidi ta ashiba jenjang dalangba/tajungba angutsü ako...Nia ne sulen anidakdi...Nia nenok den arudi....ta senzüba Public Leader kaji onoki aküm-küta merepranger aja.

~ Lilir- L.Kika Pongener.

**Sikkim-i raliwalir lakh 8 dak tema aru**



**Gangtok, August 2, 2023**

**(Agencies):** Sikkim nung alima lendong balala atalokaka tourist lakh 8 tema aruogo ta STDC Chairman Lukendra Rasaily-i ashi.

Sikkim-i tourist tem kanga ajema arur ta olulu kar prokshir ta Sikkim Tourist Development Corporation chairman-isa ashi.

"North Sikkim kübok JN Road nung rüjeb aser Pegong nung anentsüh aluaka tang tashi nung tourist 8,58,506 aruogo.

Parnok rongnung domestic aser international students dena lir aser yaküm dang nungi nisung 22000 agi teimba aruogo" ta Rasaily-i ashi.

Tourist temi Gangtok-i dang masü saka state kübok kinük nung aliba tesemtem semdang aser alima tobur ajungba repranger, ta pai ashi.


"Sorkari homestays nung temulung agütsür aser mega homestay project ka tenzükogogo. Iba nung

homestay 1000 tashi yanglutsü" ta paisa shisem.

Sikkim indang tourism industry nung nisung lakh 2,50,000 shi kati shilem agir aser Rs 500 crore aazüker ta Rasaily-isa metetdaksü.

Sikkim nung tourist atema yipten 38208 lir, registered luxury vehicles (Z series) 2206 aser J series 6200, normal taxis (SUVs like Spacio, Maxx Bolero etc) aser taxis (Alto aser Wagon amala) 12232 lir ta paisa ashi.

**Greater Tipraland olemtepraksatsütsü tasa atonga lir: Pradyot Debbarma**



**Agartala, August 2, 2023**

**(Agencies):** Tipra Motha, Indigenous People's Front of Tripura (IPFT) aser India sorkar tsüngda Greater Tipraland onük jembitsü aliba nung tenokdangba agütsütsü

tasa ka atonga lir ta Tipra Motha tanishir Pradyot Kishore Manikyha Debbarma-i ashi.

Tripura nung lisopurtem dang aremzüka atatsü mepishir kechiyong India sorkar den olemtepr tatemleni arur, ta

Pradyot-i ashi.

Taruba ita ana tsüngda Tiprasa nunger atema osang tajung angashitsü ta paisa shisem.

"Delhi nung onoki Ministry of Home Affairs den senden amendang Greater Tipraland indang jembio. Tang onoki Delhi nungi telangzüba atar ajisüaka nisung kari sorkar den olemtepr junga melidaksütsü atema tasa atonga inyaker" ta Pradyot-isa metetdaksü.

"Tiprasa nunger longjemtsüla aser politics nung ajemdaker telemsa malitsüla. Asenok ajak Greater Tipraland mesüra Tipraland külem alizüng atema inyaksüla" ta paisa ayongzüük.



Kisama nung August 02, 2023 nü Akhoya Snsa Telongjem Kohimai ayongzüükba Tsungremmung sentong arr atsütepba noksa nung angur. Iba benjongmung nung Wt. Anenla T Sato IAS sentong akhümdong liasü.



Kisama nung August 02,2023 nü Akhoya Senso Telongjem Kohimai ayongzüükba Tsungremmung sentong nung akhi tsüraburtemi inyakba mapatem sayua keyi asaba jilushi ka aiba noksa nung angur.

# 2020 election dak sendakba ken o nung Trump dak tai tongloktsü



**Washington, Luroi/August 02 (Agencies):** 2020 election nung tamakok anguba melenshitsüsü atema tasa yangluba atema taoba US tir Donald Trump dak tai tongloktsüogo.

Maparen pezü atema pa dak tai tongloktsü aser item rongnung ozüing alema senotsü agia US ashioktsüsü, kuli akar anisatsü merangba aser nüburttem temeden anema tasa tamajung yangluba densema lir. US Capitol nung January 6, 2021 nü rongrongshirong adokba dak sendakba nung tai ya tonglokja bushisügang tangzüütsü.

Arishi küm 77 tain Trump, shiba ano tir atema tokteper, pai aibelen mapa kecha meinyak ta ashir. Social media nung pai iba ken o ya tamagitsü ka lir ta ashir. Republican telok nungi yimten yimsüsür anema danga ken o ana nung tai tonglokja lir: kangasa tongtipang file tem kumdanga mamshiba aser porn

star ka nem miima sen agütsüba miimbangtsü mechi business record tiazü agütsüba densema lir.

Ita ana tsüngta pa Joe Biden makokba aser Washington DC nung pa bukumer temi Congress sapanga ozüing yanglur temi Biden nem takok kuli agütsüba mapang timtem agütsüba nung rangloker bushisügang.

Iba bushisügang maparen ya special counsel Jack Smith-i anir inyaker aser pai ashiba agi, January 6, 2021 nü asen linük yimtiba amakba ama American democracy nung kodanga majangshidang.

"Tai tongloktsüba nung shia aliba ama ibai tiazü agi animeso."

Smith-i tekeraba nung ken o jembitsü lenmang bushitsü nangzüka liasü saka aibelenba kuli tejangja mongutet tashi taoba tir ya tai maket ama bilemstüla, ta ashi.

Trump ya Washington DC

nung aliba court matsügang Brehostibarnü nokdaksü lir.

Kaket tapak 45 nung iba taitüsüba shia alidak tenüing magütsüba co-conspirators trok lir, aser itemji okatsür pezü, justice department ketdangsür ka aser political consultant ka alitsü.

Ochishia mesüi, ashi-longka aser ashikülak yimya amshia federal sorkar madak takok angutsü aser tetsükdaksü agütsüsü Trump-i tasa yanglu, ta court document nung shia lir.

January 6, 2021 nü Biden ya tir inyaksü kuli agütsüba nokdangtsü merangtsü atema Trump-i Vice-President Mike Pence mesüzüksü merang saka tamakok ajuru, ta ashir.

Ken o balala pezü nung Trump asoshi criminal counts 78 benoka lir, aser taruba tir candidate shimtsü asoshi Republican Party toktepa nung pa jenjang tajungba nung lir.

Iba Republican Party nung shimsangi Democratic nominee den 2024 November ita tokteptsü, aser ibaji Tir Biden ang asütsü imlar.

Tang tesüsa tai tongloktsüba tetetzü Trump ya ita 12 nungi 18 tsüngta mapa tamajung inyakba indang ken o asem nung adentsüsa akumtsü, anungji White House atema tanaben toktepa tali penjatsü.

Saka Trump campaign ajanga sangdong ka nung ashiba agi, Mongulbarnü tai tongloktsüba yagi election nung teka sangshiba amai akumer.

## RAFFLE DRAW RESULT

Dated:- 2/8/2023

IMRONG YOUTH'S ASSOCIATION ,LONGKHUM , Moatsümunng silver jubilee nüngtem adokba raffle draw result yamai:-

- 1st prize :- Sl.no 4121
- 2nd prize :- Sl.no 3921
- 3rd prize :- Sl.no 3385
- Consolation prize:- 0514, 2664, 0410, 0122, 4233, 2146, 4017, 2553, 3318, 0306.

Sd/-  
Secretary  
Planning committee, IYA,

## China nung küm 140 tsüngta tzünglu tesashitiba arua nisung 20 asü



**Beijing, Luroi/August 02 (Agencies):** Küm 140 tejakdang tzünglu aruba record benden tenzüker tzünglu tesashitiba agi China indang capital region nung kongshia nisung 20 asü aser 27 samar bushir.

Beijing yimti tezülen reservoir ka nung Honibar aser Bodhbarnep tsüngta tzünglu 744.8mm (29.3 inches) arua liasü, koba 1891 nungi tenzüka arudang tesashitiba alitsü, ta iba yimti indang meteorological service ajanga Bodhbarnü ashi.

Ghonda 40 nung aruba tzünglu ya July ita tepiyong aruba den menepete liasü.

Tropical Storm Doksuri yagi taoba hopta southern Fujian province nung kongshiba sülen linük yimtiba aser temeket nung tzünglu kanga sashia arudaksü aser north tsütsü ao.

Bodhbarnü ketdangsür temi emergency personnel meyrirjang aika Zhuozhou yimti-i yok, koba Beijing southwest tsütsü mile 37 shi pilar lir.

Zhuozhou nungya ayong ishika longteper, aser tzümetsüng tzi temalen nungi yima aluba ajanga kanga sashia kongshi.

Beijing temeket nung tzünglu kanga sashia aruba ajanga

nisung 20 süogo aser 27 sama aser nisung million ka jungnüa Beijing aser anasa aliba Hebei province nung anidena lir, ta state media ajanga ashi.

China Tir Xi Jinping-i local government tem dang nüburttem kumzüka ki o jen tajemba raksatsü asoshi akok tashi inyaksü totuyuba agütsü.


Bodhbarnü Beijing nung tzümetsüng tera tajemba akumer ama liasü, kechiaser yangji aliba ketdangsür temi nüburttem asoshi 'red alert' agien.

Ayong tulutem nung tzi 'warning mark' kübok ayimba ajanga Beijing ketdangsür temi tekumdangtsü ajema kumtsü, ta sorkar meyong Xinhua news agency ajanga ashi.

China nung tzümetsüng tesashitiba ya 1998 küm meyi mapang adoka liasü, aser iba mapang Yangtze ayong aser northeast tsütsü danga tzi lenmang nungi tzümetsüng adoka nisung 4,000 dak tema takum samatsü aser nisung million 15 shi talidak ki makai kumtsü.

2021 küm Zhengzhou aser meketa aliba Henan province nung tzümetsüng adoka nisung 300 dak tema asü.

## Niger-i kidanger linük pongu den arrtsü lapokshi



**Niamey, Luroi/August 02 (Agencies):** Niger nung military-i sorkar atsüngba sülen hopta ka lir kidanger linük ishika den arrtsü tanaben lapokshio. Military-i sorkar atsüngba ya bendanger linüktem aikati aitsüogo aser iba ajanga Africa anüolen Sahel tesem nung mangatettep taliba küma aotsü ta tsübauba bilemer.

"Algeria, Burkina Faso, Mali, Libya aser Chad den ali aser anüing arrtsü August 1 nü nungi lapokshio," ta military sorkar otongdar kati state television nung ashi.

Sorkari July 26 nü arrtsü ajak shibangtsü aser nüburttemi shiba tir Mohamed Bazoum pa menden nungi atsüngtokba sangdonga liasü. Tang arrtsü lapokbatem ya

timba lisehimatem lir. Regional bloc-i tenokdangba agütsür aliba ajanga Niger shishilembaba lenmang tongtiba tang tashi shibanger lir.

Niger nung military-i srokar atsüngba ya küm asem tsüngda Western aser Central Africa nung military-i sorkar atsüngba tenetbuba liasü.

Deobarnü Economic Community of West African States (ECOWAS)-i, hopta ka tsüngda Bazoum tanaben mapa nung maniokra tashiyim amshitsü ta amokmerena liasü.

Iba dak sendakba nung Burkina Faso aser Mali nati ECOWAS anema nokdak aser ashiba agi, linük temalen nungi Niger makra rara jazükba ka ama asütsü. Niger nung tensa

sensaksemstü atema ECOWAS defence tekolaktem Nigeria yimtiba Abuja nung Bodhbarnü nungi tenzüka anogo ana senden amentsü.

Niger nung aliba Europe nungrtem anir military tayimtsü ka Paris aser Rome Bodhbarnü tongogo. Ajsüaka bendanger sepaitem iba linük nungi aninba indang osang kecha mali.

France, United States, Germany, aser Italy nungi sepaitem Niger nung amenoka lir. Parnoki sepaitem nem training agütsüba den al-Qaeda aser ISIL (ISIS) amala telungpurtem den raraba mapang army nem teyari agütsür.

Germany Defence Minister Boris Pistorius-i Bodhbarnü ashiba agi, Germany nunger sepaitem teküzmükba dak sendakba nung kecha shisabulutsü mali.

Italy Foreign Minister Antonio Tajani-ia, democracy tanaben amenokshitsü atema anüolen aliba linük sepaitemi inyaksangshitsü asoshi mebilemstüla, kechiyong iba ya colonization yimya tasenba ama agizüksü, ta ashi.

## Indonesia-i USD million 300 alang drone alizük

**Jakarta, Luroi/August 02 (Agencies):** Indonesia indang defence system akangshitsü asoshi jenjang agiba nung shilem ka ama Indonesia sorkari USD million 300 alang drone 12 Turkish Aerospace ket nungi alizükogo, ta Indonesia Defence Ministry-i Bodhbarnü sangdong ka ajanga metetdaksü.

Turkish Aerospace den item drone tem alizüksü atema February 3 nü tenangzüktepa yanglu aser iba ajanga Indonesia military defence equipment tapu balala aika kümdaksüba den jenjang tajungba kümdaksütsü nükjidong nung iba jenjang agiogo. Turkish Aerospace indang headquarter ya linük yimtiba Ankara nung amenoka lir. ANKA drone 12 bo 2025 küm November ita matong tsüngda agütsüsü imlar.

January ita Indonesia-i Qatari air force-i amshiba advanced Mirage 2000-5 fighter

jets 12 alitsü atema USD million 805 alang tenangzüktepa ka yangluyogo. Iba tayimtsü ya French company Dassault Aviation-i yanglur.

Defence Ministry-i ashiba agi, linük indang tang aliba tayimtsütem kanga tejen kümogo, anungji raratsü atema renema alitsü aser air force atsüngzüka oya aliba jenjang ajungketshitsü atema takaratiba nung agütsütetba fighter aircraft defence equipment nüngdaker. Tayimtsü tasen ataba mapang tayimtsü tejentem ya karbo upgrade süogo mesüra yanglushiogo.

Defence Minister Prabowo Subianto-i, 2022 küm February ita Dassault Rafale fighter aircraft unit 42 alizüksü atema mulunga agizüka liasü. Indonesia-i twin-engine Rafale fighters trok rongnung asemo 2026 küm January ita tashi nung agizüksü imlar.

## World Cup: South Africa aser Sweden na last 16 tongogo



Sweden atema tanabuba goal idaktsüba sülen Elin Rubensson lar team mates tem den pelatepba noksa nung angur.

**Luroi/August 2, 2023 (Agencies):** South Africa team-i Bodhbarnü Women's World Cup nung tang mezüngbuba asaya ka koka last 16 tongtetogo. Parnoki iba asaya nung Italy goal 3-2 agi koka liasü.

Captain Thembi Kgatlana-i asaya nung minute 92buba nung tasembuba goal idakja South Africa atema otsü tasen ka yangluogo aser parnok taruba round nung Netherlands den asayatsü.

Italy atema Arianna Caruso-i goal ana idaktsü aser draw dang asüyonga parnok last 16-i aitsü ta bilema aliba mapang Kgatlanai-i goal ka idakja parnok asayamung nungi tsükogo.

Iba asayamung nung South Africa pur mezüngbuba asaya nung Sweden-i 2-1 agi akok aser tanabuba asaya nung Argentina den goal 2-2 agi draw süli liasü.

Asaya tenzüker minute 11buba nung Caruso-i penalty

ka ajanga mezüngbuba goal idakja Italy tejakdang toktsü, ajisüaka minute 32buba nung Italy defender Benedetta Orsi-i own goal ka idaktsüba sülen goal kasasa aküm.

Asaya tanabuba shilem nung South Africa team-i attack süa asaya aser minute 67buba nung Hildah Magaia-i lar team asoshi tanabuba goal idaktsü.

Ajisüaka Italy team asoshi Caruso-i goal ka idakja goal 2-2 aküm. Asaya draw nung tembangtsü imla liasü saka mapang apuloktsür asayaba mapang Kgatlanai-i South Africa atema tasembuba goal idakja parnok asaya akok.

Group G nungsa tanga asaya ka nung Sweden-i goal 2-0 Argentina madak takok ngua round-of-16-i iogo aser parnok United States den asayatsü.

Asaya mezüngbuba shilem nung team kati danga goal idaktsütsüsa masayatet, ajisüaka asaya tanabuba shilem nung minute 66buba nung

Blomqvist-i mezüngbuba goal idakja Sweden team tejakdang toktsü.

Iba asaya atema Sweden team nung asayar teku tashi melener asaya liasü. Asaya nung Argentina team-i goal idaktsütsüsa maongka yangluteta masaya aser minute 41buba nung asayar tejen Florencia Bonsegundo yiruba ajanga parnok kanga akoksa liasü.

Iba sülen asaya tatemlen mapang apuloktsür asayaba mapang Gabriela Chavez-i foul ka mena aser Sweden nem penaltsü metsütsü asoshi maongka agütsü, koba Elin Rubensson-i aibelen mesüi idakja parnok asaya akok.

Iba asaya makokba sülen Argentina team asayamung nungi tsükogo. Group G nung Sweden-i point teku nguteta parnok temaba jenjang nung tembang aser parnok sülen South Africa team tanabuba jenjang nung tembanga liasü.

## Australia Open: Mithun, Sindhu, Srikanth, Prannoy tanabuba round-i iogo

**Luroi/August 2, 2023 (Agencies):** Tang asaya aliba Australian Open nung Bodhbarnü India nung asayar PV Sindhu, HS Prannoy, Kidambi Srikanth aser Mithun Manjunath nung ajaki pei tata asaya koka tanabuba round tongtetogo.

Ajisüaka Lakshya Sen, külem India nung asayar Kiran George den asayaba mapang yiruba ajanga masayateti anentsüsa aküm.

Sindhu, shiba tang personal coach tasenba, Muhammad Hafiz Hashim kübok training agidar, lai mezüngbuba round nung India tsürsa Ashmita Chaliha 21-18, 21-13 agi koka liasü.

Tebur kija asaya nung Srikanth-i Japan nung asayar

Kenta Nishimoto 21-18, 21-7 agi koka tanabuba round-i ai aser Prannoy-ia, Hong Kong nung asayar Cheuk Yiu Lee 21-18, 16-21, 21-15 agi koka liasü.

Ajisüaka India nung asayatem rongnungi Manjunath-i takok tajungtiba nguteta liasü. Pai mezüngbuba round nung fourth seed aser world number seven Singapore nung asayar Kean Yew Loh 21-19, 21-19 agi koka liasü.

Manjunath tanabuba round nung Malaysian nung asayar Lee Zii Jia aser Leong Jun Hao na rongnung ka den asayatsü.

Kasa mapang nung arishi küm 21 tain Priyanshu Rajawat-ia takok tajung ngutetogo. Pai Australia nung asayar Nathan Tang 21-12, 21-16 agi koka

liasü.

Aakarshi Kashyap-i, Malaysia nung Jin Wei Goh 21-15, 21-17 agi tsükdaksü, saka Malvika Bansod bo Chinese Taipei tsür Yu Po Pai-i 20-22, 11-21 agi tsükdakja liasü.

Tanabuba round nung Aakarshi aser Sindhu na asayatsü.

Maneni Prannoy tanabuba round nung Chinese Taipei nung asayar Yu Jen Chi den asayatsü aser Rajawat o Srikanth na Taipei nung asayar Tzu Wei Wang aser Li Yang Su na den asayatsü.

Tarep temeyoktep asaya nung Rohan Kapoor aser Sikki Reddy na Korea nung tarep Seung Jae Seo aser Yu Jung Chae nati 14-21, 18-21 agi kokogo.

## Inter-District & State Table Tennis C'ship ayonger

**Dimapur, Luroi/August 2 (TYO):** Nagaland Table Tennis Association (NTTA)-i sangdong ka ajanga 26buba Inter-District & State Table Tennis Championship 2023 October 24 nungi 26 tashi Mokokchung nung asayatsü ta metetdaksüogo.

Asayamung nung asaya telesa balala yamai alitsü:

- 1) Men's Singles and Doubles
- 2) Women's Singles and Doubles
- 3) Youth Boys Singles and Doubles (under 19 yrs.)
- 4) Youth Girls Singles and Doubles (under 19 yrs.)
- 5) Sub Junior Boys Singles (under 15 yrs.)

- 6) Sub Junior Girls Singles (under 15 yrs.)
- 7) Veteran Singles and Doubles (40 yrs and above)
- 8) Men's Team championship.
- 9) Women's Team Championship.

Asayatem shirnoksa NTTA nungi züngoksema aliba district table tennis association tem nungi transfer süner parnoki tekübok len agüja aliba lokti tentet dang nungi No Objection Certificate from meshitsüla.

- 1) Transferor district t.t. Association.
- 2) Transferee district t.t. Association.
- 3) NTTA.

## Sadio Mane Saudi club Al Nassr nung denogo

**Riyadh, Luroi/August 2 (Agencies):** Saudi club Al Nassr-i Mongolbarnü Bayern Munich striker Sadio Mane den tenangzüktepba yangluba jangjashitsüogo. Pa iba club nung Ballon d'Or ponguben tashi koker aliba asayar Cristiano Ronaldo den külemi asayatsü.

African footballer of the year anaben tashi ngur aliba asayar ya Saudi league nung adenba nungtugu asayatem rongnung testüsabuba kümogo.

"Nenek den densemba atema kanga pelar aser nenok ajak den ajuruteptsü yongaya atar," ta Mane-i ashi.

Club anapronglai asaya den tenanzüktepba yangluba sangdongogo aser German media sangdong balala ajanga ashiba agi, Mane den küm asem atema euro million 30 yong tenangzüktepba yangluogo. Mane nem kümshia itasen million 40 agütsütsü aser iba den result dak ajemdaker bonuse million 10 agütsütsü.

Mongolbarnü Mane-i Bayern toktsüba atema sasa bilemba lemsatepa liasü. "Bayern toktsüba atema mepelar. Iba dang nungi tatembang tajungba südaksünüa liasü," ta ashi.

Mane Liverpool nungi season trok asayaba mapang Premier League kokogo aser pa Jurgen Klopp-i aniba team nung tongtibang asaya ka liasü.

Küm 30 sülen 2019-2020 season nung Liverpool-i mezüngbuba English league akokba mapang Mane-i par team atema goal 18 idakja liasü.

Ajisüaka 2022 küm summer nung Mane-i team toktsür aotsü atema telemtetba agia liasü.

Iba sülen Bayern-i Mane

alizütsü atema jenjang agi aser ashiba agi, pa team attack nung tongtibang asayar ka kümdaksütsü, kechiyong iba küm team striker Robert Lewandowski Barcelona-i oatok.

Bayern nung kanga tashi ita tenzüka sülen Mane team nungi junga masayatetba jangja aküm.

November ita Werder Bremen den asayaba mapang pa yiru aser season tepeyong masayateti liasü.

Pa yiruba ajanga Qatar nung World Cup nunga masayatet aser iba ajanga Senegal team tashi meiti liasü.

Iba sülen Mane 2023 küm Bayern-i meyipa aru, ajisüaka tebilemtsü balala atoka Champions League nung Manchester City makokba sülen pa aser teammate Leroy Sane na mangatetep adoka liasü.

Bayern-i Mane dang senchi euro 350,000 shi achi aser asaya ka nung shilem magitsü atema tenokdangba agütsü.

Pai iba season nung asaya 38 nung shilem agi aser goal 12 idakja liasü.

Ronaldo dak alia Al Nassr-i, summer transfer window nung Croatia midfielder Marcelo Brozovic, Brazil full-back Alex Telles aser Ivory Coast midfielder Seko Fofana nung alizükogo.

Kasa mapang nung Karim Benzema aser N'Golo Kante nata June ita Al-Ittihad nung denogo aser Riyad Mahrez-a Manchester City toktsür taoba hopta Al-Ahli nung denogo.

England nung international asayar Jordan Henderson-a tawa Al-Ettifaq-i ogo, kong pa taoba teammate aser coach Steven Gerrard den longjemogo.

## BILEMDANGANG

"Süngtong tajung nung kodanga süngjang tamajung matangtsü."